

Headlines

- जी-20 शिखर सम्मेलन अज्ज ब्राजील च शुरू होआ करदा ऐ, प्रधानमंत्री नरेंद्र मोदी होर जी-20 दी दिल्ली घोषणा पर भारत दी स्थिति ते बक्ख-बक्ख कुल संसारी मुद्दें पर कारवाइएं ते नतीजे बारै जानकारी पेश करडन।
- राश्ट्रीय युवा उत्सव 2025 गी औंदे जनवरी म्हीने 'विकसित भारत युवा नेताएं दी वार्ता' दे रूपै च मनाया जाग।
- आयुष्मान वय वंदना योजना तैहत त्र'ऊं हफ्ते अंदर गै 10 लक्ख बुजुर्गें ना दर्ज कराई लैता ऐ।
- ढाई किलोमीटर लम्मी ऐतिहासिक ज्वाहर सुरंग दी मरम्मत करियै नमें सिरेआ सोआरने दा कम्म मुकम्मल होने दे कोल कच्छ।

<><><><><><>

G-20 Summit

19में जी-20 शिखर सम्मेलन दे आयोजन लेई ब्राजील दे रियो डे जनेरियो दा म्यूजियम ऑफ मार्टिन आर्ट पूरी चाल्ली तैयार ऐ जित्थे मिम्बर मुखें दे अध्यक्ष ते अंतरराश्ट्रीय संगठनें दे प्रतिनिधि, इस बरे दिऐं घोषणाएं दे प्राथमिकताएं आहले बक्ख-बक्ख सत्रें दौरान चर्चाएं च हिस्सा लैंगन। एहदे शा पैहले अज्ज उत्थे पुज्जने पर प्रधानमंत्री नरेंद्र मोदी हंदा शानदार ते निग्गा सोआगत कीता गेआ। अजें कि ब्राजील च रौहने आहले भारतीयें दी गिनतरी मसां कोई 4 साड्डे 4 ज्हार गै ऐ पर प्रधानमंत्री मोदी हुंदे सुआगत सत्कार लेई आए दे लोकें दा जोश दिक्खदे गै बना करदा हा। ऐकती इस शिखर सम्मेलन दी शुरूआत जिस विषे कन्नै शुरू होआ रदा ऐ ओहू ऐ "इक्क न्याय ते टिकाऊ विश्व"। शिखर सम्मेलन दे पैहले रोज दुनिया दे नेता गरीबी ते भुक्खमरी बारै कुल संसारी गठबंधन दे बारै च सलाह सूत्र करंगन जिसले जे दुए ध्याडे कुल संसारी शासकीय संस्थानें च सुधारें बारै गल्लबात कीती जाग।

<><><><><><>

Brazil-Ambassador

ब्राजील भारत दे राजदूत सुरेश के. रेड्डी होरें जोर देइयै आखेआ ऐ जे 'ग्लोबल साउथ' मुलखें दे इक अगुवाह दे तौरा पर इनें मुलखें दे हितें दी राखी लेई होरनें मुलखें कन्नै जुड़ै करदा ऐ। प्रधानमंत्री नरेंद्र मोदी हुंदे ब्राजील दौरै, जेदे च ओहू जी-20 शिखर सम्मेलन च हिस्सा लैने लेई गेदे न, दे बारे च आकाशवाणी गी दित्ते गेदे इक चेचे इंटरव्यू च रेड्डी होरें आखेआ जे ब्राजील ते दक्खन अफ्रीका दे कन्नो-कन्नो भारत जी-20 बी भ्याल ऐ। ते इनें त्रौनें मुलखें दी तिगड़ी किट्टे रलियै ग्लोबल साउथ दे हितें, मुद्दे ते समस्याएं गी उजागर करै करदे न। भारतीय राजदूत नै इंटरव्यू दौरान गै इब्बी आखेआ जे जी-20 शिखर सम्मेलन भारत-ब्राजील सरबंधें गी निगगर बनाने दे कन्नो-कन्नो कुल संसारी सहयोग गी बढ़ाने ते होरनें मुद्दे गी बी तगड़ेयाई कन्नै पुट्टा'रदा ऐ।

<><><><><><>

Young-Leader

राष्ट्रीय युवा उत्सव 2025 अगले बरे 11 शा 12 जनवरी गी विकसित भारत युवा नेता वार्ता दे तौरा पर मनाया जाग। अज्ज नमीं दिल्ली च पत्रकार सम्मेलन दौरान केंद्री युवा मामले ते खेड्ड मंत्री डॉ. मनसुख मांडविया होरें एहू जानकारी दित्ती। उनें गलाया जे एहू मंच देश दे युवा शक्ति गी प्रधानमंत्री नरेंद्र मोदी हुंदे कन्नै मिलने ते अपने विचार सांझे करने दा मौका प्रदान करोग। डॉ. मांडविया होरें गलाया जे इस संवाद दा उद्देश्य पूरे मुलख दे युवाएं च प्रतिभा दी पंछान करना ऐ।

<><><><><><>

SMVD-Ropeway

औने आहले ब'रें च माता वैश्वो देवी जी दी 14 किलोमीटर लम्मी यात्रा रोपवे करी छड़ी 6 मँटें च तय कीती जाई सकोग। श्राइन बोर्ड नै ताराकोट शां छांजी छत तगर रोप-वे परियोजना लेआने दी योजना बनाई दी ऐ, जेदे करी बुजुर्ग ते विकलांग यात्रुएं गी माता दे दरबार मत्था

टेकने दी सखल्ली सुविधा हासल होई सकोग। देश दे बक्ख-बक्ख हिस्सें थमां ज्हारें दी गिनतरी च लोक माता वैशणो वेदी मत्था टेकन औंदे न।

<><><><><><>

SMVD

इस बरे अजें तगर 86 लक्ख शा मते यात्रुएं त्रिकूट पहाड़ें उप्पर स्थित माता वैशणा देवी दे मंदरै च मत्था टेकेआ ऐ। श्री माता वैशणो देवी श्राइन बोर्ड दे सीईओ अंशुग गर्ग होरें आखेआ जे एह गिनतरी दिसंबर दे अखीर तगर बधियै 95 लक्ख तगर जाई सकदी ऐ। उनें गलाया जे हर बरे माता वैशणो देवी दे दरबार औने आहले यात्रुएं दी गिनतरी बदधी जंदी ऐ। पिछले 95 लक्ख यात्रुएं माता दे दरबार मत्था टेकेआ हा। इस बरे इस रिकार्ड दे त्रुट्टने दी मेद ऐ। श्राइन बोर्ड दे बनी जाने दे बाद थमां गै माता दे दरबार मत्था टेकने आहलें दी गिनतरी हर बरे बधदी आवा' रदी ऐ। 2012 बरे रिकार्ड 1 करोड़ 4 लक्ख यात्रुएं ते 2011 बरें च 1 करोड़ 1 लक्ख यात्रुएं माता दे दरबार मत्था टेकेआ हा। श्राइन बोर्ड नै पिछले किश बरें थमां यात्रुएं दी सुविधा लेई नमियां-नमियां सहूलतां शुरू कीतियां न ते एहदे मद्देनजर हर बरे यात्रुएं दी गिनतरी च इजाफा होआ'रदा ऐ।

<><><><><><>

CJ-Mini Auditorium

जम्मू-कश्मीर हाई कोर्ट दे मुख्ख न्याधीश न्यामूर्ति ताशी रबस्तान होरें जम्मू-कश्मीर हाई कोर्ट दे जस्टिस सिंधू शर्मा, जम्मू-कश्मीर न्यायिक अकादमी दी अध्यक्ष समिति ते अकादमी दी संचालन समिति दे सदस्ये हुंदे सने अज्ज जम्मू-कश्मीर ज्यूडिशियल अकेडमी जानीपुर च मिनी आडिटोरियम दे निर्माण कम्म गी आधारशिला रक्खी। इस आडिटोरियम च 150 लोकें दे बौहने दी क्षमता होग ते एह न्यायिक अधिकारियें ते सरबंध्यत धड़ें लेई न्याय ते क्षमता दा विकास करोग।

<><><><><><>

Ayushman-Health Card

नमीं शुरू कीती गेदी आयुश्मान वय वंदना कार्ड लेई 10 लक्ख कोला मते बुजुर्गे अपना पंजीकरण कराई लैता ऐ जिंदी उम्र 70 बरें जां एहदे कोला उप्पर ऐ। इंदे च 4 लक्ख महिलां बुजुर्ग बी शामिल न। सेहत ते परोआर कल्याण मंत्रालय नै इस बारै जानकारी सांझी करदे होई आखेआ जे 29 अक्तूबर गी प्रधानमंत्री हुंदे आसेआ इस कार्ड गी जारी करने दे त्र'ऊं हफ्ते अंदर गै एहू गिनतरी दर्ज कीती गई ऐ। मंत्रालय नै दस्सेआ जे नमें लांच कीते गेदे कार्ड कन्नै 70 बरें ते ओहदे कोला उप्पर दी बरेसू दे 4 जहार 800 कोलां मते बुजुर्गे गी फैयदा पुज्जा ऐ जिंदे चा 1 जहार 400 महिलां न। एहू कार्ड आयुश्मान भारत प्रधानमंत्री जन आरोग्य योजना दा हिस्सा ऐ जेदा फैयदा कोई बी भारतीय नागरिक जेहदी उम्र 70 बरे जां एहदे शा उप्पर होए, लेई सकदा ऐ।

<><><><><><>

Jawahar-tunnel

केई दहाकें तगर घाटी दे प्रवेशद्वार दे रूपै च मुल्खै गी कश्मीर घाटी कन्नै जोड़ने आहले इक्कमात्र रस्ते दे रूपै च अपनी सेवा दिंदी आवारदी ढाई किलो मीटर कोला बी लम्मी ज्वाहर सुरंग दी मरम्मत करियै इसी नमें सिरेआ सोआरने ते भलेआं अज्जै-कल्लै दिएं तकनीकें ते सेवाएं सुविधाएं कन्नै लैस करने दा कम्म हून तोड़ चढ़ने दे कोलकाल ऐ ते इस कम्मै गी तोड़ चाढ़ने दी जिम्मेदारी सीमा सड़क संगठन नै निभाई ऐ। उआं अप्रैल 2022 च प्रधानमंत्री नरेंद्र मोदी हुंदे आसेआ पौने 9 किलोमीटर लम्मी काजीगुंड-बनिहाल नवयुग सुरंग दे उद्घाटन दे बाद इस ऐतिहासिक सुरंग दा सामरिक महत्व जरूर घट्ट होआ ऐ कीजे एहदे इस्तेमाल हून किश खास गड्डिएं दे लंगने लेई गै कीता जंदा ऐ जिनेंगी नमीं सुरंग चा लंगने दी खुल्ल नेई ऐ जियां जे तेल, पेट्रोल, डीजल दे टैंकर, एल.पी.जी गैस लैने आहले ट्रक ते होर दुइयें खतरनाक आइटमां लेइए जाने आहिलयां गड्डियां। 760 बार्डर रोड टास्क फोर्स दे कमांडर आमिया श्रीवास्तव होरें दस्सेआ जे 2010 दे बाद इस ऐतिहासिक सुरंग दी मरम्मत दी लोड़ सेही कीती गई कीजे मतिएं थारें दा एहू सुरंग चौंदी ही, एहिदएं कंधें च पानी रिसदा हा ते मती थाहें सड़क दी हालत बड़ी खराब होई गेदी ही। उनें दस्सेआ जे जुलाई 2023 च शुरू कीते गेदे इसी सोआरने दे कम्मै गी 62 करोड़ 50

लक्ख रपे दी लागत कन्नै रिकार्ड 18 म्हीने दे अंदर मुकम्मल कीता गेआ ऐ ते तौलं गै इसी ट्रैफिक लेई खोली दित्ता जाग ते सतह समुंद्र कोला 2200 मीटर दी उंचाई पर वाका एह सुरंग सैलानिएं लेई बी इक आकर्षण दा केंद्र साबत होग।

<><><><><><>

Terrorist-Arrest

सुरक्षाबलें अज्ज दक्खनी कश्मीर दे त्राल इलाके च इक आतंकी गी हथियारें ते गोला-बरूद कन्नै गिरफ्तार कीता ऐ। पुलस दे इक वरिष्ठ अधिकारी नै दस्सेआ ऐ जे अवंतीपोरा पुलस, सी.आर.पी.एफ दी 180मीं बटालियन ते 42मीं राश्ट्रीय राइफल्स नै इक सांझे अभियान दौरान त्राल इलाके शां लश्कर-ए-तैयबा कन्नै जुड़े दे इक आतंकी गी गिरफ्तार करी लैता। एहदी पंछान इरशाद अहम चौपान कन्नै कीती गेई ऐ। पुलस नै ओहदे कब्जे थमां इक्क पिस्तौल, दो मैबजीनां, 18 रौंदां ते होर दुआ समान जब्त कीता ऐ। अधिकारी नै दस्सेआ जे शुरूआती पुच्छ-गिच्छ दौरान एह पता लग्गा ऐ जे दोषी दक्खनी कश्मीर च होए दे केई आतंकी गतिविधियें च मुलव्वस हा।

<><><><><><>

Hideout

सुरक्षाबलें दक्खनी कश्मीर दे शोपियां जिले च जिमीं हेठ बनाए दे आतंकियें दे इक ठिकाने गी तबाह करी दित्ता ऐ। पुलस सूत्रें मूजब शोपियां पुलस, सेना ते सी.आर.पी.एफ नै इक सांझे अभियान दौरान लश्कर-ए-तैयबा लेई कम्म करा'रदे टी.आर.एफ दे इक ठिकाने गी तबाह करी दित्ता। तपाशी अभियान दौरान उत्थुआं हथियार, गोला-बरूद, कम्बल, खाने-पीने आह्ला समान, ट्रंक ते दुआ समेयान जब्त कीता ऐ। पुलस ते सुरक्षाबले खित्ते शां आतंकियें दा सफाया करने लेई लगातार इयै जनेहू अभियानें गी अंजाम देआ'रदे न।

<><><><><><>

MET-J&K

मौसम विभाग नै जम्मू-कश्मीर च मौसम दे खुश्क रौहने ते 24 नवंबर गी हल्की बरखा ते बर्फ पौने दी मेद प्रगट कीती ऐ। आकाशवाणी दे जम्मू संवाददाता नै जानकारी दिती ऐ जे मौसम विभाग नै 18 शां 23 नवंबर तगर जम्मू-कश्मीर च मौसम दे खुश्क रौहने ते 24 नवंबर शां हल्की बरखा ते उच्चियें धारें उप्पर हल्की बर्फ पौने दी अनुमान जताया ऐ।

<><><><><><>

India-GDP

2024 बरे लेई अनुमानिक 7 प्रतिशत सकल घरेलू उत्पाद जानी जीडीपी दी विकास दर कन्नै भारत जी-20 मुल्लें च सब्बनें शा अगगे ऐ। भारत दे सरकारी फोरम My Gov नै इक सोशल मीडिया पोस्ट च आखेआ ऐ जे एहू भारत दी निगगर अर्थ बवस्था गी उजागर करदा ऐ। भारत दे बाद 5 प्रतिशत जीडीपी विकास दर कन्नै इंडोनेशिया दुए ते 4 इशारिया 8 प्रतिशत दी रफ्तार कन्नै चीज त्रीए नम्बरै पर ऐ।

<><><><><><>